

COLOSAS

Colosas janin jihuetaibo qui Pablonen raannai joi

Noquen huetsabo qui Pablonen raanai

1 ¹Noquen Papa Dios queenaiya ta Jesucristonen hea yohinishqui jahuen raanti hea Pablo janon. Noquen huetsa Timoteo betan tah hen nea quirica huishahi. ²Man Cristo jeneyamahibo qui raannoxon tah non huishahi, heen huetsabaan. Man Colosas jema janin jihuetaibo qui tah non nea joi raanai. ¿Papan shinanya man jayamahin? ¿Papa Diosen sirijaha man jointi siripax jihueyamahin?

Noquen huetsabo Pablonen yocaxonai

³Noquen Hihbaan Papa tah non jascabijaquin yohihi, Hahxon tah min jato jai Papan Dios, hahquin. Non mato yocaxonai tihibi tah non jascajahi. ⁴Man noquen Hihbo Jesucristo nincacoinxon jatihibi noquen huetsabohon man shinanai yohihah tah non jascajaquin noquen Papa yohihi. ⁵Noquen naihoh queha Papan mato jihuemayaxihqui honanxon tah man noquen huetsabohon shinanxon jato hahxonai. Papan joi coin nincanihxon tah man jan mato jihuemayaxihqui joibo man honanscái. ⁶Jaa joi coin ta Criston joi siri qui, mato qui noconih. Jatihibi janin nocoxon jano jihuetaibo shinan hinanaxa ja joi caicanahihqui. Mato tocan ta jascarihbihihqui. Papan matohon

shinanai tah man yohihah nincamenonihxon honanrihbibi. Jaan mato hahxoncoinai tah man nincanihxon honanrihbibi. ⁷Jaa joi siri ta Epafrasnen mato nincamanishqui. Jaa ta hahan non queenai noque betan teenica qui. Criston teexonnical, hehbe teexonnical. Sirijaquin ta Criston joi mato yohixonnishqui jano caxon. ⁸Neno nocoxon sca ta Dios Yoshiman shinanmaha man noquehon shinanai jaan noque yohihipishqui.

⁹Jaa copi tah non nincamenohipixon mato yocaxonquin jeneyamahi noquen rihbi. ¿Man jenquetsahpabo jihueti Papa queenihquin? Man honancoinnon hihxon tah non mato yocaxonai. Dios Yoshiman mato jatihibi shinan hinanquin mato honanmanon hihxon rihbi tah non yocaxonai. ¹⁰Papa queenai quescsa sca man jihuemon. Man hahcai jatihibi jaquin hahan jan jenimahibo man janon hihxon tah non mato yocaxonai. Jascapahboxon tah man Papan shinanai quescajaquin jatihibi sirijatih. Jaatian tah man hashoan sirijaquin sca noquen Papa honanbonayaxihqui. ¹¹Jatihibi shinan hinanquin Papan mato coshijanon hihxon tah non yocaribibi, jahuen hihti siri shinan bichish man coshion hihxon. Jaa shinanyaxon tah man jatihibi tenetih, yosmayamahí, sinayamaribibi. Jenimaresi. ¹²Noquen Papan ta mato

yohihihqui, Heen baquebo jano jihuemon hihxon hen hahxonai xabapan sca tah man jihuetahi, hahquin. Jaa copi tah man Hahxon tah min noque jai Papan, hah man jatihi.¹³Tiroma yoshiman noque hihbojani bi ta Papan noque bichinxon noque mahnebohanihqui jahuen baquen jihuetahbo sca non janon hahan jan queenai jahuen baquen sca noque jihuemanon.¹⁴Jaa jahuen baquen ta noquen hohcha sohuanhxon non hohchanihbo shinanyamascaiqui.

**Cristo mahuani quen
noque jahuen jihuetahbo**

¹⁵Noquen Papa jisyamaxon bi tah non jaa jahuen baque honanxon noquen Papa jenquetsahpa quin hihxon honanscrai. Jaa Papan baque ta jatihibi hahnicahax jatihibi hihbo rihbi qui.¹⁶Jaan ta jatihibi janishqui, naihoh quehabo, main jaibo rihbi. Non jisibo, non jisyamahibo rihbi jaan jaquin. Meyayahpa yoshinbo, hapo yoshinbo, yonohi yoshinbo, sontaroyahpa yoshinbo rihbi, jatihibija ta jaan jato janishqui jahuena jaábo.¹⁷Jahuaibi jariyamahi bi ta jaa janishqui. Jaan rihbi ta jatihibi jaxon jatihibi manamahiqui. Jaan manamayamaha cahen jatihibi queyoquehanai.¹⁸Noquen Hihbo ta jaa qui, noque jihuemanicah. Hihquipish bi huemenonish jihué hihboscai jatihibi hihbohi. Noque jan caisai tah non huesti yora qui, jahuena.¹⁹Queenxon copi ta jaa huesti Papan hihbomanishqui, jaa huesti jatihibichin quiquin hihbo janon.²⁰Jaa mahuamaquin ta jatihibi noquen rahuiti shinan potamanishqui noque jahuen jihuetahboscanon. Naihoh quehabo, nai naman mehabo, noque jatihibi hahbetan siripi yohuannon ta jihuin hueonmaxon jahuen Papanbi noquen hohcha copi Cristo jimi potamanishqui mahuamaquin.

²¹Mato rihbi tah man Papan nahuabo hihpahoniqui. Jahuen rahuibohax tah

man tiromajaquin shinanax tiromahi japahoniqui.²²Jahuen sinatahbo que bi ta mato sirijaquin bichiqui jahuen baquebo sca man janon. Noquen yora quescapahax noque copi mahuanhxon bi ta mato sirijaquin Criston bichiqui. Jahuenahbo rahsi Papa bebonbi sca mato nihmanoxon mato sirijaquinbihquin. Hohchajoma siribo sca tah man jatihi. Papa mato hinanyahnoxon cahen mato sirijaquinbihquin.²³Criston joi jascabijaquin nincacoinaibo tah man jano nihyaxihqui jaa joi jeneyamahihbo, jaa mato yohimenoni yohuan huetsajayamahibo, huetsa joi qui mahnejaqueyamahihbo jano nichi. Jaa joi huesti tah hen jatihibi noquebo yohihi, Jaa yohinica sca mia jahue Pablón, Papan hea janí.

Papan joi nincamanicah, Pablo

²⁴Papan shinan man bihnón hihxon jahuen joi siri hen mato yohini copi ta hea rahma tiromajacaniqui. Tiroma hea jaábo bi tah hen tenehax jenimahi. Noquen Cristo ta tiromajacannishqui. Jaa tiromajaquin pishinmanixon ta hea sca tiromajacaniqui. Heen yora jaabaan tiromajahah bi tah hen Cristo tenexonai. Jahuen caisaibo ta jahuen yora qui. Jaabaan jahuen shinan bihnón hihxon tah hen tenehi.²⁵Matohon shinanxon ta mato jahuen caisaibo yohinica hea janon hihxon Papan hea yohinishqui, jahuen joi hen nincamaquin sirijanon.²⁶Neateman japahonibo honanmayamapahonixon bi ta rahma jaa jone joi jahuen caisaibo honanmati jaan yohihihqui.²⁷Mato tocan Cristo jihuetahi ta honanyamacanpahonishqui Papan jato honanmayamahah. Maton man honanscanon ta mato judiomabo honanmati noque yohinishqui. Mato chicho Cristo jihuetaiya man jahuentiho siri shinanyahpa jaa jaiquin man

honannon hihxon ta mato honanmahiqui. Jaa Cristo huesti ta noque jihuemanicah qui.

²⁸Hahqui hinamehhue hahquin tah non jatihibi joni sirijaquin yohihi. Jatihibi joni sirijaquin honanmaquin honanahbo. Jatihibi joni shinanyahpa siri sca Cristo bebon nihmanoxon hihxon tah hen yohihi. ²⁹Jascapahbo janon hihquish tah hen shinan caman hahtanax tee teetai. Jan hea hinanai coshin tah hen coshin bi res tee teetai jato yocaxoni.

2 ¹Hicha bi res hen mato yocaxonai man honannon hihxon tah hen mato yohihi. Laodicea janinhabo rihbi, jatihibi hea jisyamanibо rihbi tah hen jaayocaxonai. ²Joni huetsahon shinanxon honanmahananax maton jointi sirinon hihxon tah hen mato yocaxonai. Jaatian tah man Papan honanya jacointihi. Jahuen jone joi tah man honanquin sirijascatih, Cristo honancoquin. ³Cristo ta jatihibi honan siri jaiqui, jatihibi siri shinan rihbi. ⁴Siripi yohuanihcama jaibaan mato paranyamanon hihxon tah hen mato yohihi. ⁵Hocho jaax bi tah hen mato betanbi hihquish quesca hea jai. Jaa shinan huestiya man jihuetti siripai nincacax tah hen jenimahi. Cristo qui hinamehxon man jeneyamabiresai yohihah tah hen hihti jenimahi.

⁶Noquen Hihbo Jesucristo bijnish res sca jaa shinanya sca jihuenuahue. ⁷Noquen Hihbo honanquin sirijanahue. Jahuen shinanya rihbi haminahue hen mato haxemani quescajaquin hashoan sca jahuen joi bihbonaquin. Hahxon tah min noque jai Papan, hahquin hicha bihbonanahue.

Criston shinanyahpa non behna jihuetai

⁸Mato hihbojanoxon honanihcama jaxon quesa joibo mato nincamacanmis coiramenahue. Honancoinxona bi

jonibaan shinanai joi res ta mato honanmacatsihcanihqui. Cristonahma bi huetsa joi mato haxemacanmis yoshiman joi.

⁹Cristo ta Papan shinanya qui, Papan coshiyahpa. ¹⁰Jaa ta hihbo qui, jatihibi quiquin yoshimana, jatihibi hapo yoshimana rihbi. Jatihibichin hihboxon ta mato shinan hinancoinlhqui. ¹¹Mato ta honantijanishqui Papan jihuetahabo man hihqui honanahbo. Jonin mequeman honantijahahma bi Criston honantijahahbo tah man qui jahuen honantiyahpabo. Mai mehabo queenai quescajaquinma bi Cristo queenai quescaja non jai ta jaa honanti qui.

¹²Jeneho hihquimaha tah man Cristoyabi tsahonni quesca janiqui. Jene chicho queha huenihihnihah sca tah man Cristoyabi huenihihnihini quesca jai.

¹³Hohcha hohchayahpabohax tah man mahuascaibo japhonihqui. Maton yora janin jahuen honanti yamani jahuenahmabo quen. Man jascapahbo que bi ta Cristoyabi Papan mato jihuemanishqui maton hohcha jatihibi mato sohuaxon, noquenah rihbi. ¹⁴Non tiromajapahoni copi ta noque casticanti joi janishqui. Noquen hohcha copi hihqui bi ta Cristo jato rehemaquin noquen casticanti Papan queyonishqui, yamascanon. ¹⁵Jascajaquin ta hihti tiroma yoshinbo Papan jaton yohuanbo bichinishqui netetahbo. Jaton tiroma sontaro yoshinbo rihbi jascajaquin jaton yohuanbo bichinquin. Janibi ta jato hihtimahmanishqui. Cristo mahuamaquin ta jato netemanishqui.

Naihoh quehabo shinannahue hihqui

¹⁶Jaa copi nescapa joibo nincayamanahue. Noquen pitibo, pitimabo, xehatibo, xehatimabo, non nescajaquin fiesta netebo huinomatibo, jascajaquin huinomatimahibo, hoxne xoo

hihquiya non jascajaxonma nescajati jaibo, tantiti neten non jascajaxonma nescajati jaibo. Jascapahbo joibo mato yohihahbo bi nincayamanahue.¹⁷Pitibo, xehatibo, fiestabo, hoxne xoo netebo, tantiti netebo, jaa joibo ta janishqui. Jahua jan noque hahxonyaxihqui in honanahbo hihxon res ta jaa joibo Papan yohinishqui. Cristoyahpaxon tah non jaa joi xenibo jenescai.¹⁸Caibo ta namaquen jahua ra jisish, shinancoinihcama sca jaiqui. Jahua copi jascatimahi bi jascari. Papan shinanjomahax res sca yanca bi res yohuani. Jascapahboxon ta mato haxemacanihqui man piti tenenon hihxon mato haxemaquin. Papan naihoh queha yoshinbo qui sca man horanon hihxon mato haxemaquin. Jato nincayamanahue. Papan shinan mato bichincamnis.

¹⁹Jascapahbaan ta noquen Hihbo bihcoinyamahiqui. Noquen Hihbo huestichin ta noque coshi hinanihqui huesti yora sca jaax non haninon. Criston shinanyahpa rahsi jaax tah non yanapanhananiji huetax coshi hinanhahnanax hashoan sca Papan shinan bishbonahi.

²⁰Cristo betan mahuanibohi tah man qui, mai meha shinan potanibohi. ²¹Jahua copi sca man mai mehabaan hahcái quescajaquin man mai mehabo nincacain jaabaan mato haxemanon?

²¹Xecoyamahue, piyamahue, meheyamahue, hah ta jacanihqui. ²²Jaaban yohihibo ta non piquin queyobahinaibo rahsi qui. Jaton yohuan ta jonibaan shinanax yohuanresai qui, Papan jascahue hahcama. ²³Honan quescapa hihquish bi honancoinaima joi tah qui. Noquen Hihbo queenai quescajaquinma bi ta hahmebi shinanxon noquen Hihbo hahxonji jacanihqui. Noquen Hihbaan yohinib quescajayamaquin. Piti jaxon bi piti tenequin. Jascajaxon tah non mai

mehabo shinanbo non potatimahi jahuentianbi.

3 ¹Cristo betanbi ta mato hahquirihbi huenihhnishqui. Jaa copi jaan hinanaibo shinan benanahue. Noquen naihoh queha Papa patax tsahoxon ta noque hinanihqui. Jahuen shinan benabonanahue. ²Jaa janin res maton shinan hahnahue. Mai mehabo janin hahyamaquin. ³Man tah man mahuascaniqui. Cristo betanbi sca tah man jihuetai, Papanahbo sca. Mahuati qui raquetimascái. ⁴Noque jihuemanica Cristo sanareneni jahuiya tah man mato rihbi hahbetanbi janibi sca nihyaxihqui xabayahpabo sca.

Tiromapahonish bi behna shinanyahpa

⁵Jaa copi maton shinan tiromabo jenebahinnahue, Cristojomaxon man bihniro shinanbo. Joni huetsa betan hihqui hohchati. Haiboya yohuanti. Tsiniti. Tiromahihti queenti. Caibaan jahuabora jato bichinti shinanai. Jascaxon bichinah ta santo chibanaah jasca rabe qui. ⁶Jascapahbo copi ta nincayosmabo Papan casticanpaqueyaxihqui qui. ⁷Mato rihbi tah man jascapahbo hihpahoniqui, jascapa shinanya jaax. ⁸Jascapahbo hihnxon bi jenebahinscanahue nea jatihibi: rainyamati, sinati, tiromajati, huetsa joni qui yohuanti, rishtaya yohuanti. Jascapa yohuanbo jenebahinscanahue. ⁹Man shinanpahoni jenebahinax res sca joni huetsa betan yohuani quescayamanahue. ¹⁰Shinan behna sca tah man bichi. Papan rihbi ta mato honanmabonaquin shinan behnajaxonihqui. Mato jonijanicahton shinanai quescajaquin sca man shinannon maton shinan behnajabonaquin. ¹¹Noque behnabo tah non judiobaan nahuaboma sca jai. Judioboma rihbi sca jai. Judioboma rihbi sca jai. Jaa

honantijomaboma sca jai. Nahuabo hiyamascai. Nahua bi res nahuabo hiyamascai. Hinaboma hiyamascai. Hinaboma hiyamascai. Jascapahboma sca jaax bi Cristoyahpabo rahsi. Criston jonibo rahsi.

¹²Papan ta mato caisihqui, jahuenahbi jahuen baquebo man janon mato yohiquin. Matohon shinanquin. Behna shinanyahpaboxon sca, Papan caisaiboxon rihbi sca joni huetsa yanapanti shinan bahnahue. Joni huetsahon shinanxon hahxonti shinanbo bihquin. Huetsan yohihah nincati shinanbo, honaxonbi yohiti shinanbo. Jatsanjaha bi copitima shinanbo. Jascapa shinanbo bahnahue. ¹³Tiromahibo tenenannahue. Heen huetsa ta hehqui tiromahiqui hih min jacatsihxon bi jan mihqui tiromahibo shinanyamahue. Maton Hihbaan maton hohcha shinanyamascai quescajanahue. ¹⁴Jaa shinanbo jatihibi bihxon bi noquen huetsabohon shinanti shinanbo hashoan bishbonannahue. Noquen huetsabohon shinanquin tah man texe maton shinan sirijabahinai shinanyahpa siri sca janoxon. ¹⁵Criston maton jointibo sirijanon hihxon rihbi janahue caibo betan siripi sca jihuenoxon. Man jascari jihuenon hihxon ta mato huesti yorajanishqui. Hahxon tah min noque jai Papan, hahribinahue.

¹⁶Criston joi rihbi maton jointi janin bexojanahue hicha. Shinanquin sirijahax honammanhanannahue pontejaquin yohinani. Behuaribinahue. Papan huishani behuahi. Matonbi shinanax behuaribinahue noquen Hihbo qui behuahi. Maton jointinin shinanax Hahxon tah min noque jai Papan hihi qui behuahi. ¹⁷Man hahcái jatihibi noquen Hihbo Jesusen janen hahnahue. Maton janan yohuanquin, maton mequeman teequin rihbi jahuen janen hahquin.

Jahuen janen rihbi yohiquin, Hahxon tah min noque jai Papan, hahnahue.

Papa nincaxon jonibo yanapanti

¹⁸Maton benebaan yohihah nincanahue, haibobon. Man jato nincati ta noquen queenihqui. ¹⁹Maton haibohon queennahue, bebobon. Jato rainyamahaxma jihuenaue. ²⁰Maton papan, maton maman mato yohiha jatihibi nincanahue, baquebon. Man nincati ta noquen Hihbo hihti queenihqui. ²¹Baqueyahpabon, maton baqueyo yohiquin sirijaxon jato sinamayamanahue. Tiromajaquin shinancanmis. ²²Maton patoronen mato yohiha jatihibi nincanahue, patoroyahpabon. Sirijaquin jato hahxonnahue jaabaan jisnon hihxon res ma bi hahcoinquen noquen Hihbo shinanhahnhan. Patorobaan jisnon hihquish hihquibo quescayamanahue. ²³Jonima bi noquen Hihbo man teexonai honanxon man hahcái jatihibi coshicahinxon hahcoinnahue. ²⁴Noquen Hihbo Cristo tah man teexonai. Jaan ta mato copijaquin sca jan mato bexojaxonai mato hinanyaxihqui qui. ²⁵Tiromajanicabo rihbi ta copiyaxihqui qui jan tiromajahi copi. Casticanquin ta tsoabi cahnetimahiqui.

4 ¹Sirijaquin maton jonibo copijanahue, jonyahpabon. Sirijaquin honanxon jato copijacoinquin. Naihoh maton Hihbo rihbi jai honanxon sirijaquin jato copijaquin.

²Papa yocauquin jeneyamanahue. Jaa yocacahnan coiramenahue huetsa janin maton shinan camayamaquin. Hahxon tah min noque jai Papan hahti shinanbehn้อยamaribinahue. ³Criston joi siri hen nenoxonbi yohiti hahtipahnón hea yocaxonnahue. Papan nincamayamanixon bi rahma nincamascaí joi siri tah qui hen jato

yohihi. Jaa copi tah hen nea sipo xoboho tsahotai hea tsahonhohbo. ⁴Hen sirijaquin jato jaa joi nincamanon hihxon Papa hea yocaxonnahue, hean yohiti jai quescajaquin hen yohinon.

⁵Shinanquin sirijaxon Cristojomabó yohuanquihnnahue. Yohiti siripai tihibi jato nincamanahue. ⁶Nincati queenahbo hihxon shinanya yohuantiyaxon jato yohuanquihnnqui. Jahua min shinanain hahca tah man jascapa yohuantiyaxon jatihibi joni yohiti honanscatihi.

Hahan quirica queyoti

⁷Tíquiconen ta jatihibi hen huinotaibo mato yohiayihqui qui. Hahan hen shinanai noquen huetsa tah qui. Sirijaquin ta hea yanapaniqui, hehbe Criston yonotixon. ⁸Non jenquetsahpi jihuetaín hihxon tah hen mato qui jaa raanai man honanon hihxon. Jaan mato yohiáh man sirijaquin sca shinannon hihxon tah hen jaa raanai. ⁹Onésimo rihbi ta hahbetan cahiqui. Jaa rihbi ta hahan non shinanai noquen huetsa qui, Papan joi nincanica. Maton caibo rihbi tah qui. Nenoña joibo jatihibi ta mato yohiayihcancihi qui rabexon.

¹⁰Bernaben chahi Marcos mato qui cahiya sirijaquin bahnahue. Nocotaiya jaa yanapanyaxahnahue, hah tah hen mato janiqui. Aristarco ta heyabi sipo xoboho tsahoncanhoxqui. Aristarco, Marcos, Jesus Justo hahcaibo, jaabo rahsichin ta mato qui joi raanihqui man jascabi jayamahin, hahquin. ¹¹Jaabo quimisha

res ta heen caibo qui, hea yanapannicahbo. Papan jihuetaibó hichanon hihxon ta yanapanquin hea sirijaquin shinanmacaniihqui. ¹²Maton caibo Epafras rihbi ta Criston yonotixon nenoxon mato qui joi siri raanihqui. Noquen Papa yocaxonquin ta mato jascabijaquin shinanxon mato yocaxoniqui. Papan coshiyahpahax sca man hohchati queenyamabiresnon. Man jahuejati Papa queenihqui man honanquin sirjaribinon ta mato hihi yocaxoniqui. ¹³Mato hihi yocaxonxon ta Laodicea janinhahbo rihbi hahxonxon Hierápolis janinhahbo rihbi jato hahxonihqui. Man honanon hihxon tah hen mato yohihi. ¹⁴Noquen rahonrica Lucasen ta mato qui joi raanihqui. Demasen rihbi ta mato qui joi raanihqui, man jascabi jayamahin, hahquin.

¹⁵Laodicea jema janinha noquen huetsabo yohixonnahue, man jascabi jayamahin, hahquin. Ninfas, jahuen xoboho tsinquitai noquen huetsabo rihbi jascajaquin yohixonquin. ¹⁶Nea quirica jíssxon, Laodicea jema janinha noquen huetsabo sca jismanahue. Hen jato qui raanho quirica rihbi jisnahué, maton. ¹⁷Arquipo yohinahue, noquen Hihbaan tee hen hinanni hahxonquin sirjanoxon jan jisnon.

¹⁸Heanbi huishaxon tah hen mato man jascabi jayamahin, hahcai. Hea sipo xoboho tsahotai shinanbehnoyamanahue. Noquen Hihbaan mato shinan hinanon hihxon tah hen mato yocaxonai.